

**ПОСЛЕДОВАНИЕ
МОЛЕБНА С
АКАФИСТОМ**

**СВЯТЫМ
ПРЕПОДОБНЫМ
КИРИЛЛУ И МАРИИ
РАДОНЕЖСКИМ**

Священник: Благословен Бог наш всегда, ныне и присно, и во веки веков.

Лик: Аминь.

Священник: Слава Тебе, Боже наш, слава Тебе.

Лик: Царю Небесный, Утешителю, Душе истины, Иже везде сый и вся исполняяй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

Священник: Бог Господь и явися нам, благословен грядый во имя Господне. Исповедайтеся Господеви, яко благ, яко в век милость Его.

Лик (на 3 глас): Бог Господь и явися нам, благословен грядый во имя Господне.

Священник: Обышедше обыдоша мя, и именем Господним противляхся им.

Лик (на 3 глас): Бог Господь и явися нам, благословен грядый во имя Господне.

Священник: Не умру, но жив буду, и повем дела Господня.

Лик (на 3 глас): Бог Господь и явися нам, благословен грядый во имя Господне.

Священник: Камень, Его же небрегоша зиждущии, Сей бысть во главу угла, от Господа бысть Сей, и есть дивен во очесех наших.

Лик (на 3 глас): Бог Господь и явися нам, благословен грядый во имя Господне.

Тропарь свв. прпп. Кириллу и Марии Радонежским, глас 3

Блаженств Христовых причастницы, / честнаго супружества и попечения о чадах добрый образе, / праведнии Кирилле и Марие, / плод благочестия, Сергия преподобнаго, нам явивший, / с ним же усердно молитесь Господа / низпослати нам дух любви и смиренномудрия, / да в мире и единомыслии // прославим Троицу Единосущную.

Священник: Святѣи преподобнии Кирилле и Маріе, молитѣ Бога о нас!

Лик: Святѣи преподобнии Кирилле и Маріе, молитѣ Бога о нас!

Священник: Слава Отцу и Сыну и Святому Духу.

Лик: И ныне, и присно, и во веки веков. Аминь.

Священник: Святѣи преподобнии Кирилле и Маріе, молитѣ Бога о нас!

Лик: Святѣи преподобнии Кирилле и Маріе, молитѣ Бога о нас!

Священник: Слава Отцу и Сыну и Святому Духу.

Лик: И ныне, и присно, и во веки веков. Аминь.

Молите Бога о нас, святѣи преподобнии Кирилле и Маріе, яко мы усердно к вам прибе-

гаем, скорым помощникам и молитвенникам
о душах наших.

*Далее поем Акафист святым со всяким вниманием и усердием. Первый кондак поется всеми, все остальные кондаки и начала икосов читаются иереем; херетизмы (радуйтесь...) поются попеременно женской и мужской (в тексте выделено **жирным**) половинами, по два, начинается женская половина; последний херетизм икосов и Аллилуйю кондаков поют все вместе.*

Кондак 1

Избрании чудотворцы и предивнии угод-
ницы Господни, / Сергия великаго
Церкви Российстей даровавшии, / преподоб-
нии Кирилле и Марие, / обители Хоть-
ковския заступницы: / Пение похвальное вам
приносяще, молим вы усердно: / яко имущии
дерзновение ко Господу, / предстательством
вашим от всяких бед нас свободите / и на-
следники Царствия Небеснаго соделайте, да
зовем вси радостно: /

Радуйтеся, преподобнии Кирилле и Ма-
рие, / усерднии о нас пред Богом молитвен-
ницы.

Икос 1

Ангели земнии и человецы небеснии
воистину явитесь, преподобнии Кирил-
ле и Марие, от юности ваша чистую совесть
пред Богом имущии, и добре во благочестии
вкупе пожившии. Мы же, таковое богоугод-
ное житие ваше прославляюще, гласы хва-
лебными взываем сице:

Радуйтесь, от юности ваша Христа воз-
любившии и Тому единому поработавшии;
радуйтесь, целомудрия хранителие и ду-
шевные и телесныя чистоты рачителие.

**Радуйтесь, души и тела ваша в обита-
лице Духа Святаго уготовившии;
радуйтесь, исполненнии премудрости и
разума Божественнаго.**

Радуйтесь, яко от земли на небо преидо-
сте и тамо со ангелы Троице предстоите;
радуйтесь, яко со бесплотными лики Три-
святую песнь Ей воспеваете.

**Радуйтесь, на небеси и на земли от
Господа прославленнии;
радуйтесь, обретшии место вечнаго все-
светлаго упокоения.**

Радуйтесь, преподобнии Кирилле и Марие, усерднии о нас пред Богом молитвенницы.

Кондак 2

Видя Отец светов богоугодное житие ваше, благоволи избрати вас, блаженнии, да явите миру светильник пресветлый - Сергия преподобнаго, в немже и ваши имена прославляются и вси вернии воспевают Господу: Аллилуиа.

Икос 2

Разумом Божественным просвещеннии, Кирилле и Марие, непрестанно поучаща своя в послушании и кротости. Умудрите убо и нас, преподобнии, заповедем Господним следовати неложно, да обрящем, якоже и вы, спасение вечное и принесем вам благохваления таковая:

Радуйтесь, блаженнии, в боголюбии пожившии и благоверие сохраниши;

радуйтесь, милости и сострадания преисполненнии.

**Радуйтесь, милостынею и молитвами
Небесное Царствие стяжавшии;**

радуйтесь, смирением и пощением вечное блаженство улучившии.

Радуйтесь, яко мзда ваша многа на Небесех есть;

радуйтесь, яко молитвами вашими и мы надежды Царствия Христова не лишаемся.

Радуйтесь, яко радость ваша вечна во светлостех святых;

радуйтесь, яко тояжде радости вашим предстательством и мы сподобляемся.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 3

Силою Божию ограждаемь, преподобный Кирилл князю Ростовскому со всяким усердием служа, вкупе с ним во орду Агарянскую, мира ради, хождаше, да людие Российстии ослабу от ига нечестивых имут и Богу непрестанно поют: Аллилуиа.

Икос 3

Имуще помышление и удивльшеся молящиися в церкви людие о трикратном во чреве Мариином плода глашении, разумеша

нечто преславное и чудное быти: и по сих уведевше радостное сына рождение, радовахуся. С ними же и мы радостная вам, преподобнии, приносим, глаголюще:

Радуйтесь, двоице святая, Богом благословенная;

радуйтесь, звезды пресветлии, богоугодный путь супружескаго жития верно указующии.

Радуйтесь, родители блазии добраго и избраннаго плода;

радуйтесь, благодати Божия исполненнии.

Радуйтесь, супругов в Православной вере и благочестии наставляющихи;

радуйтесь, богобоязненному воспитанию чад нас научающихи.

Радуйтесь, целомудрия супружескаго образи преизящнии;

радуйтесь, хотящих богоугодно жити изряднии учителяе.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 4

Буря скорбей и напастей житейских не
Ослаби крепкия любве вашей к Богу, Ки-
рилле и Марие, блаженнии, но паче научи
вас изряднее отражати разженные стрелы лу-
каваго. Научите убо и нас вся скорби мира
сего с кротостию претерпевати, поюще Богу:
Аллилуиа.

Икос 4

Слышавше Варфоломея, грамоте неискус-
на, чтуща же богодохновенныя писме-
ны, удивишася зело, блаженнии, благодарен-
ие Богу принесоша, премудрость отроку
через Ангела даровавшему, егоже в дом свой,
яко старца-схимника прияша, заповедь апо-
стола Павла соблюдающе: страннолюбия не
забывайте. Мы же, таковую благодать Бо-
жию вам явленную ведяще, вопием сице:

Радуйтесь, заповедей Христовых вернии
исполнителие;

радуйтесь, учения Евангельскаго истин-
нии последователие.

**Радуйтесь, угодницы и друзи Божии;
радуйтесь, странноприимства древняго
праотца Авраама подражателие.**

Радуйтесь, светом благочестиваго жития
вашего просиявшии;

радуйтесь, любовь и милосердие к нищим
и сирым явившии.

**Радуйтесь, беспомощным скории по-
мощницы;**

**радуйтесь, яко и нам присно помогаете
и к Небесному Отечеству руководствуете.**

Радуйтесь, преподобнии Кирилле и Ма-
рие, усерднии о нас пред Богом молитвенни-
цы.

Кондак 5

Богоотечным звездам подобни бысте, пре-
блаженнии Кирилле и Марие, егда, при-
шедше от страны Ростовския в пределы кня-
жества Московского, во граде Радонеже все-
литесь и тамо сущих людей благочестием
своим удивисте, подвизающе тех пети: Алли-
луиа.

Икос 5

Видевше, святии, тщание сына вашего
Варфоломея к иноческому житию, мо-
ляху его, да пребудет с вами до кончины ва-
шей. Он же, яко сын послушания, издетска

наученный вами заповеди Господни исполняти, покорися воле вашей, якоже Божией, Кирилле и Марие, научая всех воспевати тако:

Радуйтесь, блаженств Христовых причастницы;

радуйтесь, честнаго супружества и попечения о чадах истиннии образи.

Радуйтесь, ангелонравнии человецы;

радуйтесь, преподобных и праведных сопричастницы.

Радуйтесь, Пресвятые Троицы вернии служителие;

радуйтесь, яко и чад ваших почитати Ю научившии.

Радуйтесь, яко сын ваш Триипостасному Божеству обитель дивную устрои;

радуйтесь, яко сего ради и ваша святая имена прославлена суть по всей Руси.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 6

Проповедницы веры Православныя и Превнителие благочестия не словом токмо, но и житием вашим бысте во граде Радонеже, прехвальнии Кирилле и Марие. Темже и Святая Церковь достойно почитает вас, немолчно воспевая дивному во святых своих Богу: Аллилуиа.

Икос 6

Возсия яко свет благочестивое в болярстве житие ваше, преблаженнии Кирилле и Марие, егда же достигше возраста преклонна, образ иноческий на ся воспряли есте во обители Хотьковстей, вышшее нам смирение показующе. Темже с любовию вопием вам таковая:

Радуйтесь, любве ради Господа славу мира сего оставльшии;

радуйтесь, славу Божию возлюбившии;

Радуйтесь, во обитель древнюю пришедшии и тамо покой себе обретшии;

радуйтесь, святую схиму в броню спасения восприявшии.

Радуйтесь, Покрову Богородицы души своя вверившии;

радуйтесь, образ Ангельский восприимшии.

Радуйтесь, всем иноком и инокинем доброе правило;

радуйтесь, прежде кончины ваша блаженства от Бога удостоившиися.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 7

Хотя Человеколюбец Господь явити в житии вашем, преподобнии Кирилле и Марие, образ назидания, не токмо людем мирским, но и иноческому лику, внуши вам в старости маститей оставити всякое попечение земное и восприятити образ ангельский, яко венец нетления, во еже воспевати Троидиному Богу Серафимскую песнь: Аллилуиа.

Кондак 7

Новую благодать показа всех Творец и Владыка чрез вас, преподобнии, егда прешли есте от временныя сия юдоли плачвыныя во обители вечныя. Святыя бо мощи

ваша еще и под спудом сокровенны, чудеса источаху: многим болящим, наипаче же приносимым к вам младенцам исцеления подаваху. Сего ради примите, врачеве наши блаженнии, от нас похвалы сицевая:

Радуйтесь, смертию временною пришедши к жизни вечней;

радуйтесь, от Господа нетлением и чудесы прославлении.

Радуйтесь, яко память ваша с похвалами и успение со святыми;

радуйтесь, яко имена ваша написана на Небесех и благословенна во Отечестве вашем.

Радуйтесь, болящим младенцем исцеление подающими;

радуйтесь, болящую девицу, с верою и любовию к вам притекшую, от недуга тяжкаго избавивши.

Радуйтесь, о любящих и чтущих вас небеснии предстателие;

радуйтесь, от Господа дары благодати Его нам присноподающими.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 8

Страшное и ужасное бедствие прииде на землю Московскую егда язвою моровою узвлены быша людие мнози во градах и весех и умроша. Тогда собор освященный со инокини Хотьковския обители молебная пения вам приношаху и предстательством вашим избавление от смертоносных беды получиша, вопиюще благодееющему чрез вас Богу: Аллилуиа.

Икос 8

Вси боголюбцы скорбию великою объаты быша, егда во дни гонений и лихолетий, на землю Российскую нашедших, обитель Покрова Пречитыя Девы в Хотькове разорению и запустению богоборцы предаша. Память же ваша, преподобнии, в благочестивых людех незабвена бысть и прославляема сие:

Радуйтесь, чудотворцы наши предивнии;

Радуйтесь, града Хотькова ограждение.

Радуйтесь, обители вашей хранителие;

Радуйтесь, земли Радонежския покровителие.

Радуйтесь, на враги видимыя и невидимыя крепции споборницы;

радуйтесь, благодеяний множество источающими.

Радуйтесь, состраданием вашим всех объемлющим;

радуйтесь, всем нам приснии ходатаи спасения.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 9

Вся Церковь Божия радовашеся, егда обитель ваша, преподобнии Кирилле и Марие, возсоздася и мощи ваша честныя, от лет древних Богом хранимыя, обретены и в храме соборнем положены быша. Сего ради людие к вам в напастех прибегают и помощь от вас получают, благодарне вопиюще Богу: Аллилуиа.

Икос 9

Витийство человеческое не довлеет к достойному прославлению чудес от мощей ваших и ныне совершающихся, преблаженнии Кирилле и Марие. Некая монахиня старица немощная, костное сокрушение имев-

шая и от врачей исцеление не обретшая, к вам, преподобнии, притекши, со слезами моляшеся. Здравие же получивши, во умилении сердца воспеваше вам:

Радуйтесь, благодати Святаго Духа сосуди избраннии,

радуйтесь, радости нам вечныя благоприятнии ходатаи.

Радуйтесь, немощных от недугов скоро исцеляющи;

радуйтесь, благодатными исцелении изрядных врачей удивляющи.

Радуйтесь, нетленнии благоухающи цветы;

радуйтесь, к безсмертию указующии лучи.

Радуйтесь, на земли величием чудес блистающи;

радуйтесь, на небеси со Ангелы Бога славящи.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 10

Спасение вечное наследовавше, богоблаженнии Кирилле и Марие, душами вашими во обителях горних неразлучно в Бозе пребываете, честными же мощами вашими во обители Пресвятыя Девы нетленно вкупе поживаете и обильная исцеления источаете, нас же в Горний Иерусалим оный руководствуете, вопиющих Богу: Аллилуиа.

Икос 10

Стена и прибежище вы есте, преподобнии, всем к вам притекающим, ихже вы от искушений и соблазнов мира сего сохраняете, во обители же вашей живущих монашескому деланию научаете. Сего ради вам сицевая благодарственная словеса приносим:

Радуйтесь, руководствующии нас ко спасению;

радуйтесь, наставляющии шествовати по заповедем Господним.

Радуйтесь, научающии терпеливо нести крест свой;

радуйтесь, яко вашими молитвами невредимы от бесов и человек злых пребываем.

Радуйтесь, яко вы есте ходатаи о святей обители вашей;

Радуйтесь, яко Богом собранным сестрам в ней вы есте помощницы.

Радуйтесь, чадолюбивии наши заступницы;

радуйтесь, яко с преподобным Сергием престолу Божию предстоите.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 11

Пение молебное приносят вам, преблаженнии Кирилле и Марие, не во обители Хотьковстей токмо живущии, но и вси, чтущии сына вашего, преподобнаго Сергия. Прежде нежели поклонится честным мощем его, по завету древнему, вам благодарение возносят: честь бо сына на родители переходит. Сего ради мы, прославляюще род праведных, поем Богу: Аллилуиа.

Икос 11

Светом трисиянным осияваеми, всеблаженнии Кирилле и Марие, со всеми свя-

тыми предстоите ныне Небесному Царю и яко светила светозарная, присно просвещаете души притекающих к раце мощей ваших, сего ради, прославляюще вас, глаголем:

Радуйтесь, яко скончали есте жизнь свою телом, и духом же не отступаете от нас;

радуйтесь, с верою приходящих к раце мощей ваших благодатно освящающих.

Радуйтесь, бисери сияющие и благодатно люди просвещающие;

радуйтесь, свети умнии, зарю Святаго Духа облистающие.

Радуйтесь, умиловителие известнии Царя Небеснаго;

радуйтесь, услышателие скории призывающих молитвенно честная имена ваша.

Радуйтесь, помощницы дивнии, упование на вас по Бозе возлагающих;

радуйтесь, всем православным всякое прошение во их пользу исполняющих.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 12

Благодать от Бога вам данную ведяще, прилежно молим вы ныне, прехвальнии схимонаси: пролейте теплую о нас молитву ко Господу, да сохранит Отечество ваше неврежденно от напастей и нестроений, и нас да помилует и спасет, вопиющих Ему: Аллилуиа.

Икос 12

Поюще ваше Богоугодное житие,ற்பодобнии, и на небесех от Бога прославление, ублажаем праведное преставление ваше, величаем чудеса, от святых мощей ваших истекающая, и на неусыпныя молитвы ваша уповающе, взываем вам сицевая:

Радуйтесь, житие ваше земное благочестне скончавшии;

радуйтесь, от Царя Небеснаго венцы славы приимшии.

Радуйтесь, облеченнии в ризу благодатнаго нетления;

радуйтесь, во благоухании святыни нетленно почивающии.

Радуйтесь, препоясанныи силою многих чудес;

радуйтесь, яко честныя мощи ваша врачебница явишася недугом человеческим.

Радуйтесь, яко от них всяк, с верою приходяй, дары целебныя приемлет;

радуйтесь, яко обитель ваша по всей земли россиястей прославляется.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 13

О преславнии чудотворцы и угодницы Господни, преподобнии Кирилле и Марие! Приимите сия моления наша от всея души вам ныне возносимыя и сподобите нас предстательством вашим достигнути Небеснаго Царствия, идеже Ангели и вси святии воспевают непрестанными гласы хвалу Пресвятей Троице: Аллилуиа, аллилуиа, аллилуиа.

Этот кондак поется трижды, затем снова поется 1-ый икос и 1-ый кондак:

Икос 1

Ангели земнии и челоуцы небеснии воистину явитесь, преподобнии Кирил-

ле и Марие, от юности вашае чистую совесть пред Богом имущии, и добре во благочестии вкупе пожившии. Мы же, таковое богоугодное житие ваше прославляюще, гласы хвалебными взываем сице:

Радуйтесь, от юности вашае Христа возлюбившии и Тому единому поработавшии;

радуйтесь, целомудрия хранителие и душевныя и телесныя чистоты рачителие.

Радуйтесь, души и телеса ваша в обителище Духа Святаго уготовившии;

радуйтесь, исполнении премудрости и разума Божественнаго.

Радуйтесь, яко от земли на небо преидосте и тамо со ангелы Троице предстоите;

радуйтесь, яко со бесплотными лики Трисвятую песнь Ей воспеваете.

Радуйтесь, на небеси и на земли от Господа прославлении;

радуйтесь, обретшии место вечнаго всесветлаго упокоения.

Радуйтесь, преподобнии Кирилле и Марие, усерднии о нас пред Богом молитвенницы.

Кондак 1

Избрании чудотворцы и предивнии угодницы Господни, / Сергия великаго Церкви Российстей даровавшии, / преподобнии Кирилле и Марие, / обители Хотьковския заступницы! / Пение похвальное вам приносяще, молим вы усердно: / яко имущии дерзновение ко Господу, / предстательством вашим от всяких бед нас свободите / и наследники Царствия Небеснаго соделайте, да зовем вси радостно: /

Радуйтесь, преподобнии Кирилле и Марие, / усерднии о нас пред Богом молитвенницы.

+ + +

Священник: Вонмем. Премудрость. Вонмем.
Прокимен, глас четвертый: Честна пред
Господем смерть преподобных Его.

Лик (на 4 глас): Честна пред Господем смерть
преподобных Его.

Священник: Что воздам Господеву о всех яже
воздаде ми.

Лик (на 4 глас): Честна пред Господем смерть
преподобных Его.

Священник: Честна пред Господем...

Лик (на 4 глас): смерть преподобных Его.

Священник: Премудрость прости, услышим
Святаго Евангелиа. Мир всем.

Лик: И духови твоему.

Священник: От Матфеа Святаго Евангелиа чте-
ние.

Лик: Слава Тебе, Господи, слава Тебе.

Священник: Вонмем.

Священник читает Евангелие: Мф, 20 зач.

Лик: Слава Тебе, Господи, слава Тебе.

Священник: Помилуй нас, Боже, по велицей ми-
лости Твоей, молим Ти ся, услыши и поми-
луй.

Лик: Господи, помилуй (*трижды*).

Священник: Еще молимся Тебе, Господу Богу нашему, еже услышатися гласу моления нашего и молитве и помиловати рабов Твоих благодатию и щедротами Твоими и исполнити вся прошения их, благоприятным же быти мольбам и милостыням их пред престолом владычества Твоего, и покрытии их от всех враг видимых и невидимых, от всякие напасти, беды и скорби и недугов избавити: рцем вси: Господи, услыши и помилуй.

Лик: Господи, помилуй (*трижды*).

Священник: Еще молимся о еже милостивно презрети на усердная моления рабов своих, честнаго христианскаго брака взыскующих <имена> и о еще благословити благое намерение сердец их и стязи их исправить: рцем вси: Господи, услыши и помилуй.

Лик: Господи, помилуй (*трижды*).

Священник: Еще молимся и о всякой душе христианстей, скорбящей же и озлобленной, милости Божия и помощи требующей.

Лик: Господи, помилуй (*трижды*).

Священник: Еще молимся за всю братию и за вся христианы.

Лик: Господи, помилуй (*трижды*).

Священник: Услыши ны, Боже Спасителю наш, упование всех концов земли, и сущих в мори далече, и милостив, милостив буди, Владыко, о гресех наших, и помилуй ны: милостив бо и человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

Лик: Аминь.

Священник: Ко святым преподобным Кириллу и Марии, Радонежским и вся России чудотворцам, во умилении сердец помолимся.

(все опускаются на колени)

Лик: Святии преподобнии Кирилле и Марие, молитесь Бога о нас!

Священник: О блаженная двоице, воистину земли русския украшение, святой преподобный Кирилле и святая преподобная Марие; образ брака христианскаго яви Господь преславное

житие ваше; славно бо пожилы есте в лета тяжкия для земли и народа нашего и вся скорби и искушения мира сего претрели есте единою плотию - сего ради прослави Господь вас и супружество ваше.

Темже смиренно молим вас, препadaюще перед святым образом вашим: умолите Господа, да сотворит юношам и девам зде предстоящим и непорочного христианскаго брака взыскующим по прошению сердец их.

Но и на несохранившия чистоту души и тела своего, но в покаянии новаго жития взыскующия благопреклони будите. Весте бо, яко несть добро человеку единому быти.

Смиренно просим вас, помяните перед престолом всех Царя прошения рабов Божиих: всех нас, зде предстоящих и молящихся. Да исправит Господь стези наша.

Ей, блазии о нас пред Богом заступницы, испросите нам смиренномудрия, кротости и рассуждения христианскаго. Помозите нам очистить от страстей сердца наша. Вы бо учителя и образи чистаго жития преизряднии есте и ходатаицы о нас по Бозе во веки веков.

Лик: Аминь.

Далее поется величание святым и все подходят на помазывание елеем от мощей преподобных.

Величание:

Ублажаем вас, / святии преподобнии Кирилле и Марие, / и чтим святую память вашу, / наставницы монахов / и собеседницы ангелов.

После сего поется: «Земле Русская...» и другие стихирьы из службы Собора русских святых, также богородичен «О преславного чудесе...»

Священник: Слава Тебе, Христе Боже, упование наше, слава Тебе.

Лик: Слава Отцу и Сыну и Святому Духу, и ныне и присно и во веки веков. Аминь.

Господи, помилуй. Господи, помилуй.
Господи, помилуй.

Благослови.

Священник говорит отпуст.